

舊館壇碑攷

公翁 舊 碑 番
大 館 石
季 壇 一

商承祚題



序

吳江翁君叔均承其尊甫海琛先生家學篤好金石
研求遺文佚事補正前人記載之闕失心細而力又
勤焉歲丁酉九秋予僑居吳下偕其同邑楊君聶石
過訪出所輯陶隱居舊館壇碑攷見示并手摹其文
之前後數行爲贈而乞予書梗槩於卷首予讀其書
知此碑久亡乃於其鄉人齋獲見潘稼堂所藏舊拓
本假歸而細審之并詳攷碑之源流及古今人之論
說以辨別之閱兩年之久而成此書因得攷定其文
第一行二十四字爲隱居手自書其後皆孫文韜書

碑立於梁之天監十七年其陰之文則刻於普通三年也言言有據事事求實遠可補歐陽棐集古錄目之說近可訂顧亭林金石記之譌詢可謂是碑之功臣也隱居書刻罕傳於世君家覃溪閣學嘗謂是碑舊拓止有潘氏一本今叔均旣雙鈎全碑之文又爲專書闡發而表彰之如得好事者重模其碑并刻叔均此書相埒以行豈非快事歟叔均年纔踰三十而好古力學已爲儕輩所傾曩當於其鄉之古刹訪得南宋嘉定閒金城王廟石鼎又購得鶯脰湖所出之元至元管軍總把官印皆爲攷證可補志乘之掌故

者則其他日學問之奧博詎有涯涘之可量哉予故
不辭而爲之序云道光十有八年歲次戊戌仲春旣
望嘉定赤蓮里木居士瞿中溶書於古泉山館之吉
羊鐙室時年七十



上清真人許長史舊館壇碑弟子華陽隱居丹楊陶
弘景謹造

此一行隱君手自書

悠哉曠矣宇宙之靈也固非言象所傳文跡可記嘿
然則後之人奚聞乎含吐萬有化育羣生本具所由
義歸冥昧至於形域區分性用殊品事限觀聽理窮
數識者儻或可論山之高海之廣夫何故以其有容
焉大天之內復有小天卅六所並祐寓地空亘涂水
脉闢闡風岫通氣雲巘此山本号句曲其下是第八
洞宮名曰金壇華陽之天周迴一百五十里分置三
府前漢元帝世有咸陽三茅君得道來掌此任故稱

茅山具詳傳也至晉海西太和元年句容許長史在
斯營宅厥迹猶存宋初長沙景王就其地之東起道
士精舍梁天監十三年勅買此精舍立爲朱陽館將
遠苻先徵定祥火曆於館西更作隱居住止十四年
別創鬱岡齋室追玄州之蹤十五年建菩提白塔以
均明法教十七年乃繕勒碑壇仰述真軌

真人姓許諱穆世名謚字思玄本汝南平輿人後漢
靈帝中平二年六世祖光字少張避許相諛俠乃來
過江居丹楊句容都鄉之吉陽里後仕吳爲光祿勳
諱字亮拔奕葉才明祖尚字元甫有文章機見吳中

書郎文副字仲先器度淹通風格清簡晉剡令寧朔
將軍下邳大守西城侯長史副第五子也正生少知
名蘭文在蕃爲世表之交起家太學博士朝綱禮肆
儒論所宗出爲餘姚令勲恤民隱慙被鄰邑徵入凱
闡納言帝側升平末除護軍長史本郡中正外督戎
章內銓茂序遐邦肅偉鄉采砥行太和中遷給事中
散騎常侍蟬冕輝華事歸尙德蘭文踐極方優國老
儵值晏駕於焉造退專靜山廬以脩上道君雖搢紱
朝班諷議庠塾而心標象外志結霞明第四兄遠遊
永和四年嘉遁不反君尙想幽奇歲月彌軫恒與楊

君深神明之契興寧中眾真降楊脩令宣喻龍書雲
篆僉然遍該靈謨奧旨于茲必完年涉懸車遵行愈
篤太元元年解駕違世春秋七十有二子姪禮空靈
柩於縣西大墓京陵之蹤未遠飛劍之瑯在焉謹案
真君挺命所基緣業已久乃周武王世九宮上相長
里薛公之弟也兼許肇遺功復應垂祉後胤故乘運
託生因資成道玉札所授爲上清真人爵登侯伯位
編卿司理仙撫治佐聖牧民矣真傳未顯於世莫得

具述

楊君諱義真
誥具有事跡

長史第三子諱玉斧世名颺字道翔正生母陶威女

先亾已得在洞府易選宮中君清穎瑩絜特絕世倫
郡舉上計掾不赴粃糠塵務研精上業卽引景玄中
眞師也恒居此宅繕脩經法楊君數相從就亟通眞
感太和五年於茲告逝時年卅眞誥云後十六年當
度東華爲上相青童君之侍帝晨受書爲上清仙公
與谷希子僅臧帝辰之位
比世侍中君長兄揆世名眎次兄席
牙世名聯並亦得道揆今有玄孫靈眞在山勅立嗣
眞館以裒遠祖之德皇上乘弘誓本力來君此土燾
育蒼祇範鑄羣品導法裁俗隨緣開教以隱居積蘊
三眞經誥久栖華陽宜還舊宅供養脩理乃勅工近

建茲堂靖旣仰祖 帝則兼闡大猷東位青壇西表
素塔壇塔之間通是基趾埋瓴甃瓦投插便植紫煙
白霧纏個陰盖宅南一井卽長史所穿井南大塘乃
郭朝遺製源出田公之泉路通姜巴之軌傍枕雷平
前瞰下泊東際連崗北橫長靚柳汧陽谷俱會西垂
四域之內皆謂金陵地腴者也長史所居尤爲標勝
方將駟雲虬而高騁駟奔鷖以追風望洪濤之浩汗
睠故都以浸遠古人有言匪作奚傳敢刊石頌永屬
來賢

渾樞驚氣方祇吐靈依性分境傳識賦形化通八寓

功挾四溟巡跡電滅測體淵渟旋區岳立亘海雲舒
搏風泳水蹠實憑虛亦有幽近開石架廬情高身麗
天府地居縈巒已曲畫壤腴浮五闡面啟九涂環周
長隰旁領交并比流迺稱龍伏寔謂金丘昔在西漢
三茅來賓爰鑒東晉二許懷真裁基浚井棲道接神
允膺輔聖錫茲侍晨叅差年代細緼名氏書誥具宣
精暉未弭缺茲將淪沉堦已毀拱樹霜摧脩庭草委
肇館華陽歲踰二紀永觀前猷聿遵鴻軌帝曰楸哉
爾焉斯心經之營之輪乎魚矣勝殿密響瀉瓶揚芬
瑤宮碧簡絢采垂文瓊函玉檢綺幕繡巾蘭釭迺耀

金鑪颺薰桐栢雙教方諸兼學並證心清俱漏身濁
離有離无且華且朴結号虛皇筌法正覺藥徵質瑩
禪感慧通行飛歛忻捫景帶虹振苦排鄣還明反聰
物言是力我見無功紛紜今古汗漫兩儀三相多惑
舟壑自移緣来則應不慮不爲式題龜錄人天鑒知

碑陰記

此碑梁普通三年太歲壬寅金石刻至唐大曆十三年太歲戊午凡二百六十有六年文字將湮中山劉明素字暎微重加洗刻

華陽隱居陶弘景丹陽秣陵西鄉下里人宋孝建三年丙申歲夏至之日未曉時生仕齊高武世諸王侍讀奉朝請永明十年壬申歲投紱栖山住中茅嶺上立爲華陽館至梁天監四年移居積金東澗七年往永嘉楠江青樟山十年涉海詣霍山十一年夏還木溜屿其年十月奉敕迎還舊山十三年正月至茅山入住東澗十四年冬徙來此館十五年移鬱岡齋室

靜齋

上清弟子華陽前館主吳郡海鹽陸逸冲年五十八
上清弟子宗元前館主東海剡縣楊超遠年五十五
上清弟子未陽館主丹楊湖孰潘淵文年五十六

上清弟子華陽前館主晉陵丁景達年五十

上清弟子華陽前館主晉陵馮法明年五十

上清弟子嗣真館主丹楊句容許靈真年三十二

上清弟子四明山館主會稽山陰潘文盛年五十七

上清弟子太平山館主吳郡錢唐褚仲儼

齊世祖武皇帝

太宗明皇帝

衡陽王蕭筠

揚州刺史始安王蕭遙光

荊州刺史文惠公蕭遙欣

尚書令太子少保丹陽尹建昌侯沈約

開府儀同三司平固忠敬公呂僧珍

侍中吏部尚書吳興太守謝覽

南梁州刺史豫章王司馬季延胄

交州刺史始興王司馬阮研

臨海太守伏曼容

晉安太守謝纂

晉熙太守紀僧猛

梁武皇帝

太尉揚州刺史臨川王蕭宏

開府儀同三司南平王蕭偉

南平王世子蕭恪

侍中豫章內史太尉長史謝舉

臨川王世子前羅平侯蕭立正

廷尉卿虞權

唐右王侯朝士刺史二千石過去現在受經法

者普通三年五月五日略記